

每週經課朗誦經文(巴克禮台語漢字)2013/08/11

共同經課 - 1 以賽亞書一章一節，十節~二十節

1 當烏西亞、約坦、亞哈斯、希西家做猶大王的時，亞摩斯的子以賽亞，所得著論猶大及耶路撒冷的默示。10 恁所多瑪的官長啊，著聽耶和華的話！恁蛾摩拉的百姓啊，著俯耳孔聽咱的上帝的教示！11 耶和華講：恁獻許多祭物互我，有甚麼利益？公綿羊的燒祭及肥的精牲的油，我已經飽厭啦；牛犛的血，羊仔的血，山羊犛的血，我攏無歡喜。12 恁來朝見我，是誰對恁討此個，來吨(thún)踏我的院啊？13 莫得閣獻空空的禮物。香料是我所厭惡的；月的初一、安息日，召集的聚會，是行歹，守嚴肅會，我慳袂住。14 恁逐月的初一及節期，我的心怨恨，看伊做重擔；互我擔袂起。15 恁抬起手，我欲掩目矚毋看恁；恁多多祈禱，我也毋聽。恁的手滿滿刮人的血。16 恁著洗、來家己清氣，對我的目矚前除去恁所行的歹，息恁的做歹，17 學習行好，尋公平，拯救受壓制的；給無父的子伸冤，為守寡人辯護。18 耶和華講：恁來，咱相及辯論。恁的罪雖然親像朱紅，欲變白親像雪；雖然紅親像胭脂，欲白親像羊毛。19 恁若甘心聽趁，欲得著食地上的好物，20 若毋聽趁，反轉悖逆，欲受刀劍吞滅。因為耶和華親嘴講伊。

共同經課 - 2 詩篇五十篇一節~八節，二十二節~二十三節

1 [亞薩的詩。]全能的上帝——耶和華有講出話來召天下，對日出到日落的所在。2 對齊全媿的錫安，上帝有發出光。3 阮的上帝欲來，決斷無靜靜。有火佇伊的面前啲燒；有風佇伊的四圍真透。4 伊欲叫頂面的天及地；為著欲審判伊的百姓，5 講：著招集我聖的百姓來我遮，就是許個用祭祀及我立約的人。6 諸個天欲顯明伊的公義，因為上帝本身是做審判者。(細拉)7 我的百姓啊，恁著聽，我欲講！以色列啊，我欲警戒你；我是上帝，你的上帝！8 我無因為你的祭祀責備你；你的燒祭常常佇我的面前。22 恁袂記得上帝的人，著想此個事，免致我將恁拆碎，無人拯救。23 見若用感謝獻做祭的就是榮光我；謹慎行的人，我欲互伊看見上帝的救恩。

共同經課 - 3 希伯來書十一章一節~三節，八節~十六節

1 信就是所向望者的實在，及未看見的事的憑準。2 因為佇此個，就古早人有得著干證。3 對信，咱知諸個世界是對上帝的話來造成；按呢，所看見的，毋是對會看見的來成。8 對信，亞伯拉罕受召的時就順命令出去，到將來欲得著做業的地；伊出去，毋知欲去叨落。9 對信，就出外佇所應允的地，親像佇毋是家己的地，倚起佇布棚，及以撒、雅各就是相及承接同一樣的應允的。10 因為伊向望有地基的城，是上帝所經營起造的。11 對信，撒拉，雖罔過生產的年歲，猶得著會懷孕，因為伊掠應允伊的做信實。12 所以對一人閣是親像已經死者生滋，親像天星的多，親像海沙的袂算得。13 諸個攏是照信來死，未曾得著所應允的；獨遠遠看，歡喜來等接，閣家己認佇地上做人客，做出外的。14 因為按呢講的是表明 in 啲尋一個祖家。15 in 若數念所對遐出來的地，就有通倒去的機會。16 總是今 in 欣慕閣卡好的，就是佇天裡的。所以上帝稱做 in 的上帝，無掠做見諺，因為已經替 in 備辦一個城。

共同經課 - 4 路加福音十二章三十二節~四十節

32 恁細的羊群啊，莫得驚，因為恁的父歡喜用國互恁。33 著賣恁所有的來賑濟人，為著恁本身備辦袂會舊的錢袋，佇天裡用袂了的財寶，就是賊袂到、蟲袂蛀的所在。34 因為恁的財寶佇遐，恁的心也欲佇遐。」35 「恁的腰著結啲，恁的燈著點啲，36 恁著親像人啲聽候 in 的主人對婚姻的筵桌倒來。到地，拍門，通連鞭給伊開。37 主人到，看見 in 警醒，許個奴僕有福氣。我實在給恁講，主人欲互 in 坐桌，家己緒帶，進前來伺候 in。38 豈探二更，抑是三更到，看見 in 按呢，許奴僕有福氣。39 家主若知賊甚麼時欲到，伊就張持，不致伊的厝受挖孔，這是恁所知。40 恁也著備辦便；因為恁無拍算的時，人子來啦。」